

Ny Baiboly ho an'ny ankizy
dia manolotra

Ilay mpitondra
hafatr'
Andriamanitra



Nosoratan'i: Edward Hughes
Sarin'i: Alastair Paterson; Byron Unger; Lazarus
Nampifanarahin'i: E. Frischbutter; Sarah S.
Nadikan'i: Fikambanana "Ndao mba hiaraka aminay" na
association "Allons ensemble" FJKM Nazareta Amborovy
Mahajanga Madagascar
Novokarin'i: Bible for Children
www.M1914.org

BFC
PO Box 3
Winnipeg, MB R3C 2G1
Canada

©2022 Bible for Children, Inc.
Azo atao ny fandikana na fakana ity tantara ity
nefa tsy ho amin'ny fitadiavam-bola.

1

Indray andro, ny mpisorona be anankiray antsoina
hoe Zakaria, nandro ditin-kazo manitra tao
an-tempolin'Andriamanitra. Ny vahoaka rehetra
nandritra izany nivavaka tety ivelany.
Tampoka teo, taitra sady toran-kovitra
i Zakaria. Hay nisy anjelin'ny Tompo
niseho taminy. "Aza
matahotra" hoy
ilay anjely.



2

"Andriamanitra no naniraka ahy. Hiteraka zazalahy ny vadinao. Jaona no ataonao anarany. Izy dia hampody olona maro be ho ao amin'Andriamanitra."



3

"Mitenena aminay, ry Zakaria." Tety ivelany gaga ny olona. Tsy fantany manko fa ny anjely Gabriela dia niteny tamin'i Zakaria fa ho moana izy mandra-pahateraky ny zaza noho izy tsy nino ny hafatr'Andriamanitra. Nihevitra mantsy Zakaria fa efa antitra loatra ny vadiny ka tsy afaka hanan'anaka intsony.



4

Nony tonga tany an-tranony Zakaria, dia nosoratany daholo izay nolazain'i Anjely taminy. Gaga sy talanjona Elizabeta vadiny. Efa ela tokoa izy ireo no nangataka nivavaka mba hahazoana zanaka. Ahoana no hahatongavan'izany indray amin'izao taonan'izy ireo izao?



5

Fotoana vitsy tao aorian'io dia tsapan'i Elizabeta fa manana anaka izy. Ary dia nisaotra an'Andriamanitra izy noho izany. Indray andro, tonga namangy an'i Elizabeta ny vehivavy havany iray antsoina hoe Maria. I Maria dia nitoe-jaza koa tamin'io fotoana io.



6

Vao niditra ny trano i Maria, dia henon'i Elizabeta nibitaka ny zaza tao an-kibony. Feno ny Fanahy masina i Elizabeta. Fantany fa io zanak'i Maria io dia tsy iza akory fa i Jesoa Kristy Tompo. Ka dia niaraka nisaotra an'Andriamanitra tamim-pifaliana izy roa.



7

Niteraka ny zananilahy arak'izay nampanantenain'Andriamanitra tokoa i Elizabeta. "Antsoy hoe Zakaria toy ny anarandrany ny zaza" hoy ny mpisorona sasany. Teo vao tsaroan'i Zakaria ny baikon'Andriamanitra ka hoy izy: "Tsia, Jaona no anarany." Rehefa voasotr'i Zakaria tamin'ny taratasy izany teny izany, dia afaka niteny indray izy. Ary nisaotra an'Andriamanitra.




8

Rehefa niha-lehibe Jaona, dia nanahaka an'i Elia, ilay lehilahy maherin'Andriamanitra. Jaona dia nampahafantatra ny olona ny amin'ny hahatongavan'ilay Zanak'Andriamanitra. Nankahala azy ny lehiben'ny Jiosy noho izy miteny mandrakariva hoe: "Mibebaha ianareo. Aoka izay ny fahotana."

Tsy te hiala

amin'ny fahotany anefa izy ireo.



9

Ny olona sasany dia niantso azy hoe Jaona mpanao batisa satria izy dia nanao batisa ireo olona nanenina noho ny fahotany. Indray andro, dia nanatona an'i Jaona koa i Jesoa mba hataony Batisa.


Tsy nanaiky i Jaona:

"Izaho no tokony ataonao Batisa."

Fa Jesoa namaly ka nanao hoe:

"Ekeo ihany aloha androany."

Ary Jaona dia nanao batisa an'i Jesoa.



10

Rehefa vita ny batisan'i Jesoa, Jaona dia nahita ny fanahy masina nidina teo ambonin'i Jesoa toy ny voromailala. Izany dia fambara avy amin'Andriamanitra. Fantatr'i Jaona fa i Jesoa dia zanak'Andriamanitra. Zanak'ondrin'Andriamanitra mpanaisotra ny fahotan'izao tontolo izao no iantsoan'i Jaona an'i Jesoa.



11

Jaona dia nitarika olona marobe tokoa ho ao amin'Andriamanitra. Saingy Heroda ilay mpanjaka ratsy fanahy dia nanagadra azy. Hoy Jaona tamin'i Heroda: "Tsy afaka maka an'i Herodiasy, vadin'i rahalahinao, ho vady ianao, fahotana izany." Fantatr'i Heroda fa marina tokoa izany.



12

Fantany fa i Jaona dia mpanompon'Andriamanitra, lehilahy masina sady marina. Saingy tsy te-hiala amin'ny ratsy fanaony izy. I Jaona koa tsy nanaiky hijanona hitory hiady amin'ny fahotana, eny na dia fantany aza fa hampigadra azy izany.



13

Nanao fety lehibe i Heroda ho fankalazana ny andro nahaterahany. Nandihy ho azy ny zanakavavin'i Herodiasy. Nahafinaritra an'i Heroda izany.

"Omeko anao daholo izay angatahinao amiko"

hoy izy nianiana taminy. "Eny fa na dia ny antsasaky ny fanjakako aza."



14



"Inona re no angatahiko e?" hoy ilay zazavavy anakampo. Ny reniny, Herodiasy, izay nankahala an'i Jaona, dia nanoro hevitra azy ny amin'izay tokony angatahina. Mampivarahontsana!


15

"Omeo ahy eo ambony lovia lehibe ny lohan'i Jaona" hoy ilay zazavavy mantsy an'i Heroda. Nanenina i Heroda nanao fianianana taminy, saingy be loatra ny ambompony hiverenany indray amin'ny teny nataony. "Tapaho ny lohan'i Jaona ka ento aty amiko." Hoy Heroda nanome baiko. Ary dia notanterahan'ny miaramilany izany.



16

Tamin'alahelo lehibe no nandevenan'ireo namany ny nofo mangatsiakan' ilay mpanompon'Andriamanitra tsara fanahy sady mahatoky. Tapitra hatreo noho izany ny asan'i Jaona. Angamba fantatr'izy ireo fa mbola eo i Jesoa hampahery azy ireo amin'ny alahelony.



17

Ilay mpitondra hafatr'Andriamanitra

Tantaran'ny Tenin'Andriamanitra, ny Baiboly,

Tao amin'ny bokin'ny

Marka 6 ; Lioka 1, Lioka 3

"Ny fanambaràn'ny teninao dia manazava."
Salamo 119:130

18

Ny tantara ao amin'ny Baiboly dia miresaka amintsika ny amin'Ilay Andriamanitsika mahafinaritra, izay namorona antsika ary maniry ny hahafantarantsika Azy.

Fantatr'Andriamanitra fa manao zava-dratsy foana isika, izany no antsoiny hoe "fahotana". Fahafatesana no sazy ho antsika noho ny otantsika, saingy tian'Andriamanitra tokoa isika ka nomeny Jesosy Zanany ho faty teo amin'ny hazo fijaliana, mba ho voasazy noho ny helontsika. Avy eo nitsangana tamin'ny maty Jesosy, ary niakatra any an-danitra! Raha mino an'i Jesosy ianao, ary mangataka Aminy mba hamelàny ny helokao, dia havelany tokoa izany! Honina ao aminao Izy, ary ianao honina miaraka Aminy mandrakizay.

Raha te-hibebaka hiala amin'ny fahotanao ianao, dia izao no afaka lazainao amin'Andriamanitra:

Ry Andriamanitra ô, mino aho fa maty ho ahy Jesosy, ary velona Izy ankehitriny. Miangavy Anao aho, Tompo ô, midira ao amin'ny fiainako, ary mamelà ny heloko, mba hahazoako fiainan-baovao, ary ho avy ny andro handehanako eny Aminao ho mandrakizay. Ampio aho ho velona ao aminao, tahaka ny Zanaka. Amena.

Vakio ny Baiboly ary miresaha amin'Andriamanitra isan'andro!
Jaona 3.16

20

Tapitra

37



19